



Politiit atuuffiat pillugu inatsisip Kalaallit Nunaannut atuutilernissaanut peqqussutissatut missingiummut Kalaallit Nunaanni Namminersorlutik Oqartussat akuersinissaat pillugu Inatsisartut aalajangiiffigissaattut siunnersuut.

(Ineqarnermut, Attaveqarnermut, Aatsitassanut, Inatsisip Atuutsinneqarneranut Naligiissitaanermullu Naalakkersuisoq)
(Siullermeerneqarnera)

Demokraatit Naalakkersuisut qutsavigerusuppaat isummerfigisassatut siunnersuutip uuma saqqummiunneranut, tamaat isigalugu politiit pillugit aqqissuusseqqinnermut utaqqisatsitit ilaagunarmat. Sapaatit akunnerisa siuliini eqqartuussisarnermut- aamma pinerluttulerinermut inatsisip oqallisigisimavagut, taakkulu ersarissumik atassuteqartut takuneqarsinnaallutik aamma uani siunnersuummi.

Maluginiarpara, isummerfigisassatut siunnersuuteqarnermi inatsisip atoreersup aqqissuunneqarsimanera pingaarutilinnut erseqqissarneqarsimasoq, kalaallit nunaanni pissutsinut tulluussarlugu tassani nakorsamik aamma/imaluunniit peqqissutsimut ilisimasaqartumik peqataasoqarnissaanut tunngasortaa imaluunniit nunap immikkoortuisa ilaanni amigaatigineqartartut, pisariaqartitsisoqartillugulu politiit sakkutuunik ikiorteqarnissaminnut periarfissaat. Allakkiami maluginiagassaavoq, ileqqoreqqusatigut pisinnaatitsinnerit imaasillugu, Politidirektøri kommuninik tamakku pillugit oqaloqatiginninnissaanut, aammalu Naalakkersuisunut Avannaani- aamma Tunumi nunanut eqqissisimatitanut tunngatillugu. Tamanna pitsaasutut isigaarput, taamatut nunaqavissut piginnittuunerisa innuttaasut inatsisitigut innarlitsaalinissaat annertusissamat.

Naak politiit pillugit aqqissuusseqqinnissaq pitsaasutut isigigaluarlugu, matumuuna kalaallit nunaanni politiit sulinerminni atugassarititaannut aarlerissuteqarnermut annikkusupparput. Inuuniarnikkut ajornartorsiutit annertuut isigisagut aammalu nunanut allanut sanilliullugit pinerluttuliornerit qaffasinneri pissutigalugit, pissusissamisoorsoraarput pingaarutilittut erseqqissassallugit politiit danskit politiivnut sanilliullugit sulinerannut atugassarititaasut naleqqutinnginneri. Oqaluttarfimmii – inuit naapittarfianni tusaasinnaasaannik oqallinnerni – pingaaruteqartumik politiit amigaataaneri oqaatigineqartarpoq, aammalu nunami isorartoorsuarmi najugaqarfitsinni sumiiffinni kommunefogedit ikippallaarneri, tamannalu aamma kingunerisinnaasarpaa pinaveersaartitsinerup amigaataanerani. Politiinik kommunefogedinillu amigaatiginninnerup kingunerikajuppaa, pinaveersaartitsinermi innuttaasut akornanni ersinnginnerat, taamaalilluni assersuutigalugu pisortat illuutaannik serlersaarinerujussuaq, aqqusinermi eqqissiviilliornerit, persuttaanerit angerlarsimaffinnilu eqqissiviilliornerit, minnerunngitsumillu sulisut, nungullartut kingunipilutitsinissaminnullu ulorianartorsiortut.

Tamanna attanneqarsinnaanngilaq, sulisunik pissarsiniarnissarput ataavartumillu atorfeqartitsisinnanissatsinnut ajornakusuulissamat. Taamaattumik nunaqavissut pigisaannik politiinut tunngasunik aqqissuusseqqinneq maanna justitsministeeriaaqarfimmit akisussaaffigineqartoq kalaallit nunaanni politiit sulinerminni atugarisaannut tunngasut misissornissaannik piumassuseqarnerannik



nalorninartoqarmat. Taamaattumik kajumissaarutigerusuppara misissorluarneqassasoq, politiit pillugit aqqissuusseqqiineq sulisussaqaarniarnermut sunniuteqassanersoq.

Taamatut oqaaseqarlunga siunnersuutip aappassaaniinginnerani inatsisinut ataatsimiititaliaq sulilluarnissaanik kissaappara.